

## 1458 febr 29, AKDOG 712, regest 318

AKDOG 712, regest 318; 29-2-1458

Aleid, natuurlijke dochter van wijlen Willem Ansems verkoopt aan Ansem Jan Berchs een erfpacht van vier vaten rogge uit een groesveld op de Nieuwe Graaf in Gemert, neven kinderen Jan Maes aan een zijde, Jan Berchs en Jan van den Bleeck aan de andere zijde, een eind Peter Grieten en ander eind Heyntje Jan Berchs.

Transcriptie Jan Timmers

Wy Everart van Handel, Lambrecht Ymbrechts soen, Peter Goessens soen, Joan Dirck Wautgers soen, Henr. Wolff, Roloff Gerijts soen ende Maes Jan Maes soens soen, scepenen in Ghemert tuygen in desen openen brieve dat voir ons is komen Alijt naturlike dochter wilner Willem Anssums soen met hoeren gekoeren momber die hoir met vonnisse ende met recht gegeven is gelijckerwijs als gewoenlic ende recht is ende heeft wittelicke ende erffelicke vercoeft opgedragen ende overgegeven Anssumen Jan Berchs soen vijf erff vaeten roggan der maten van Gemert erffelicken te gelden ende jairlicken te betalen altoes op onsser lieven vrouwen dach purificatio als men kerssen boert van ende wt enen stuck groesvels gelegen binnen der herlicheyt van Ghemert als.. opten nuwen grave neven erffenisse Jan Maessoens kynderen metten eenre sijden metten andere sijden neven erfenisse Jan Berchs ende Jans vanden Bleeck dat een eynde Peter Gryeten soens erff dat ander eynd Heyngen Jan Berchs soen eest als sy seden. Voert soe heeft die vercoepers voirsz met hoeren momber opten voirscreven erff pacht vertegen tot behoeff des coepers voirsr. ende die vercoepers voirsr. heeft geloefft den coeper voirsr. dese voirsr. vijf erff vaten roggan inden voirscreven onderpande te weren als men erffrogge sculdich is te weren gelovende die vercoepers voirsz den voirsr coeper dese voirsr onderpant altoes goet genoech ende wael dogende te maken vanden voirsr erff pacht sunder argelyst. Ghesegelt mitten segel ons ghemeyns scependoms van Ghemert int jair ons heren dusent vyrhondert acht ende vijffich neghen ende twyntich dage in februaris.